



PREZIDÉNSIA KONSELLU MINISTRUS

VI GOVERNUN KONSTITUSIONÁL

KOMUNIKADU IMPRENSA

Sorumutuk Konsellu Ministrus nian iha loron 13 fulan-juñu tinan 2017

Konsellu Ministrus hala'o sorumutuk iha loron-terça ne'e, iha Palásiu Governu, iha Dili, no aprova ona **dokumentu traballu nian ida ho proposta alterasaun nian sira ba Rejime Jurídiku Aprovizionamentu, Kontratu Públiku no ninia Rejime Infrasaun sira**. Dokumentu ne'e halo rezumu ba liña prinsipál sira husi polítika revizaun kona-ba rejime aprovizionamentu nian ne'ebé hahú vigora husikedas tinan 2005, ne'ebé hetan revizaun husi grupu traballu ida iha ámbitu nasional. Dokumentu ne'e sei sai alvu husi konsulta interna sira, iha faze dahuluk, no husi konsulta polítika sira, iha faze daruak. Ministériu Finansas sei verifika impaktu finanseiru no orsamentál ne'ebé maihusi rejime foun ne'e bainhira tama iha vigór. Rejime ida daudaun ne'e nian kompostu husi diploma legál tolu ne'ebé la hanesan (aprovizionamentu, kontratu públiku no infrasaun sira). Revizaun ida ne'e simplika no atualiza ninia konteúdu sira, iha rejime úniku ida, ne'ebé klaru liu, simples, objetivu, rigorozu no transparente liután ba ajente Estadu no Administrasaun Públika nian sira no ba públiku.

Estratéjia Nasionál Empregu tinan 2017-2030, ne'ebé apresenta ona husi sekretária Estadu ba Polítika Formasaun Profisionál no Empregu, hetan ona aprovasaun. Bazeia ba Planu Estratéjiku Dezenvolvimentu (PED) tinan 2011-2030 no iha Programa Governu VI nian, Estratéjia ne'e rekoñese importánsia husi empregu formál ba dezenvovimentu ekonómiku nasaun nian, ne'ebé buka hodi aumenta prokura no hadi'a oferta husi merkadu traballu nian no hametin instituisaun sira.

Konsellu Ministrus aprova ona **assinatura memorandu kona-ba Rejime Komérsiu Esternu ne'ebé vigora daudaun iha Timor-Leste**, iha ámbitu prosesu [adezaun ba Organizasaun Mundiál Komérsiu nian](#). Dokumentu ne'e apresenta husi Ministru Estadu, Koordinador Asuntus Ekonómikus, hodi kumpre etapa ida tan husi prosesu adezaun nian ba organizasaun ida-ne'e.

Apova ona mós diploma tolu ne'ebé apresenta husi Ministériu Solidariedade Sosiál.

Diploma dahuluk, **Rejime Jurídiku kona-ba Instituisaun sira Solidariedade Sosiál nian**, fó ba instituisaun hirak ne'e estatutu espesífiku ida, husi rekizitu no prosedimentu sira ne'ebé oras ne'e define ona. Diploma ne'e define nia obrigasaun no direitu sira, nune'e mós ho possibilidade atu simu apoiu no



Palácio do Governo,
Avenida Presidente Nicolau Lobato,
Dili, Timor-Leste

pcm.gov.tl@gmail.com
(+670) 33 310 608

kontratu sira Estadu nian ba ezekusaun resposta sosiál sira. Diploma ne'e mós define rejime espešial kona-ba fiskalizaun ne'ebé atu aplika, husi Estadu.

Diploma daruak, **Rejime Jurídiku kona-ba semitériu espešial sira ba kombatante sira libertasaun nasionál nian “Jardín Eroí Pátria sira nian”**, hatuur norma hirak ne'ebé regula funsionamentu husi simitériu espešial sira-ne'e no prestasaun ónra fúnebre sira, ne'ebé prevee ona iha Estatutu husi Kombatente Libertasaun Nasionál nian sira.

Diploma datoluk define **estrutura, objetivu sira no kompeténsia sira Konsellu Kombatente Libertasaun Nasionál nian**. Órgaun ne'e kria ona iha tinan 2011, ho alterasaun ba artigu da-35 husi Estatutu Kombatente Libertasaun Nasionál nian, hodi akonsella Governu kona-ba asuntu sira ne'ebé relasiona ho defeza interese Veteranu sira nian no asuntu sira seluk ne'ebé ko'alia kona-ba Kombatente Libertasaun Nasionál.

Konsellu Ministrus aprova ona [alterasaun área husi rai ne'ebé Estadu fó atu halo Projeitu Investimentu Turístiku husi empreza Pelican Paradise.](#)

Aprova ona **Rejime Jurídiku funsionamentu ne'ebé iha ligasaun ba malu entre Faculdade Medicina no Siénsia Saúde UNTL nian no Ospítal no unidade sira husi Servisu Servisu Nasionál Saúde nian**. Ligasaun ba malu entre Saúde no Edukasaun ida ne'e ninia objetivu mak atu hadi'a ensinu, investigasaun sientífika no formasaun kontínua ba profisionál saúde nian sira.

Bazeia ba proposta husi Ministru Administrasaun Estatál, [altera ona Dekretu-Lei kona-ba Lisensiamentu Mensajen Publisitária sira nian](#), atubele hamenus taxa ne'ebé aplika iha divulgasaun mensajen publisitária sira nian.

Konsellu Ministrus nomeia ona Sabino Henriques hanesan Prezidente **Konsellu Administrasaun Autoridade Aviasaun Sivil Timor-Leste (AACTL)**. Pedro da Costa Freitas no Ricardo da Costa Ribeiro simu ona nomeaasaun hanesan vogál sira organizmu ne'e nian. **REMATA**

DILI, LORON 13 FULAN-JUÑU TINAN 2017



Palácio do Governo,
Avenida Presidente Nicolau Lobato,
Dili, Timor-Leste

pcm.gov.tl@gmail.com
(+670) 33 310 608